

INUIT ATAQATIGIIT

Inatsisartuni



23. maj 2025

Inatsisartut Suleriaasianni § 37, imm. 1 naapertorlugu apeqqutit tulluuttut Naalakkersuisunut saqqummiuppakka:

Naalakkersuisunut apeqqutit:

- 1. Kiffartuussinissamut isumaqatigiissutinit immikkoortut aalajangersimasut piffissami isumaqatigiiffiusumi utertillugit sullissisunik allanik isumaqatigiissuteqartoqarsinnaava?**
 - A. Naamiuppat: Air Greenlandimik, KNI/Pilersuisumik Ralimillu kiffartuussininerup naammaginnartuunnginnera innersuussutigalugu kiffartuussinissamut isumaqatigiissutit atuuttut atorunnaarsinneqarsinnaappat?**
- 2. Tunumi internetimut periarfissap pitsanngorsarnissaa pillugu Naalakkersuisut sunik Tusass A/S-mut piumasaqaateqarpat?**
- 3. Internetimik periarfissap pitsanngorsarnissaanut Naalakkersuisut Tusass A/S-mut piumasaqaateqarsimanngippata, tamanna ataatsimeersuarnermi tullermi pissava?**
- 4. Innuttaasunut isorliunerusuni najugaqartuni, kiffartuussinissamut isumaqatigiissutinik immikkut pinngitsuuisinnaanngitsunut sullissinerit pisariaqartut qularnaarniarlugit Naalakkersuisut kiffartuussisunik nutaanik atuilersinnaanermut piareersimappat?**

(Inatsiartunut ilaasortaq, Nivi Rosing Inuit Ataqatigiit)

Tunngavilersuut:

Tunumi pilersuinerup isumannaatsuunera ullumikkut ilungersunarpog, ilaatigut Air Greenlandip uteqqiattumik timmisartuussinernik taamaatsitsiinnartarnera kiisalu sikorsuit pissutigalugit RAL-p

tulassinnaaneranut ajornartorsiuteqartarnera pissutigalugu. Tamanna innuttaasut nioqqutissanik ulluinnarni atortakkaminnik pisariaqartitaminnillu allanik pissarsisinnaaneranut toqqaannartumik kinguneqartarpoq. Taamattaaq internetimut attaviit naatsorsuutigisamit pitsaannginnerupput, taamatullu innaallagissamik imermillu pilersuineri killilersuutit inuussutissarsiorterup ineriartortinnissaanut periarfissanut killiliivoq.

Innuttaasut Tunumi najugaqartut ulluinnarni pisortat kiffartuussinerannik pitsaannginnerusumik atugaqartinneqarnerat taamatullu nioqqutissanik ulluinnarni atugassianik, inuiaqatigiinni atugarissaartuni periarfissaasariaqaraluartunut amigaateqartarnerat tamatuma kinguneraa.

Kiffartuussinerup nalinginnaasup eqqortinneqarsinnaajunnaarnera ajoraluartumik oqaatigisariaqarparput. "Taamaattuaannarnikuuvoq" sumulluunniit atorneqarsinnaanngilaq. Taamaammat manna periarfissanik allanik misissuilluta Tunumi pisortat kiffartuussinerannut aaqqiinissamut nutaanik suleqatissarsiornissatsinnut piffissanngortoq isumaqarpunga. Taakku tassaasinnaapput kiffartuussisut nutaarluinnaat imaluunniit nassiussanik assartuinnermut, ilaasunik angallassinernut telefonimut internetimulluunniit ilassutitut isumaqatigiissuteqarnerit.

Tunumi innuttaasut digitalikkut attaveqaasersuutini pitsaannginnerusunik atugaqartitaanerat akuersaarneqarsinnaanngilaq. Piffissami internetimut attaveqarnerup ilinniartitaanermut, suliffeqarnermut peqqissutsimullu tunngaviunerani, aaqqissutit sukkanerusut piujuartullu anguniarnissaannut periarfissarsiortoqartariaqarpoq – tassani satelliti aqqutigalugu internet sullissisunit allanit neqeroorutigineqartoq maanna Tusassip sullissineranut allatut periarfissaasinnaanera ilanngullugu.

Ullut suliffiusut qulit ingerlaneranni apeqqutimma akineqarnissaat qinnutigaara.